

# Concert communabel dils chors da Tujetsch

Ils chors mischedai da Sedrun e Rueras sco era igl Orchester Surselva e solist(a)s

representan «Ils siat sogns Viarvs»

LG

B-4-2000

DA HANS HUONDER

■ **Questa fin d'jamna eis ei finalmein aschi lunsch: Suenters preparativas che han cuzzau varga in onn, presentan ils chors mischedai da Sedrun e Rueras en collaboraziun cun solistas, solists ed igl Orchester Surselva la ovra «Ils siat sogns Viarvs» da César Frank. Per la vischnaunca da Tujetsch ei la collaboraziun dils dus chors enzatgei niev. Igl october 1998 han ils chors mischedai da Sedrun e Rueras decidu da collaborar e representar in'ovra pli gronda igl onn 2000. Il schaner avon in onn ein ins semess allas preparativas ed als emprems exerchezis.**

## Pli u meins glied indigena

Sut la direcziun da *Tarcisi Hendry* ch'ei dapi 1993 dirigent dil Chor mischedau Sedrun, ei la cumposiziun da chors, solistas, solists ed orchester succedida. «La presentaziun da quell'ovra astga bein vegnir considerata sco in punct culminont cultural ella historia da nos dus chors e da nossa vischnaunca, essend en nossa val aunc mai vegniu presentau ina ovra da dimensiun semeglionta, realisada dil tuttafatg da glied da nossa regiun», scriva *Marcus Munsch*, president dil comite d'organisaziun en siu beinvegni, integraus el program dall'occurrentza.

Per dar il colorit necessari e duiu all'entira ovra ein ils dus chors da Tujetsch sedecidi da representar l'ovra en collaboraziun cun igl Orchester Surselva. Cun pintgas excepziuns eis ei reussiu als organisaturs da gudignar solistas e solists indigens sco era dalla regiun per quei grond project. Ultra dils dus chors e digl orchester vegnan ils auditurs ad udir sonda e dumengia sera la solista indigena *Sandra Munsch* sco era ils so-



**Bunamein tschien personas ein engaschadas questa fin d'jamna vid «Ils siat sogns Viarvs» presentai a Sedrun.**

FOTO B. BERTHER

lists *Rest Giuseppe Tuor, Lukas Albrecht ed Alvin Muoth*. Tut en tut collaboreschan 64 cantaduras e cantadurs sco era 20 musicistas e musicists. «Igl entusiassem per quella ovra ei staus gronds dall'entschatta enneu. Nus essan semtgai e perschuadi da saver presentar a nos auditors ina grondiusa caussa», accentuescha *Tarcisi Hendry* che diregia per l'emprema gada ina caussa aschi gronda.

Igl entir project cuosta rodund 35 000 francs. «Ina part da quella summa savein nus cuvierer cun entradas. La baselgia tschaffa 400 personas e nus sperein che nus sappien emplenir ella duas ga», di *Tarcisi Hendry*. Ils organisaturs ein vegni susteni da biars sponsurs, seigi quei interpresas, privats ni era la vischnaunca e la pleiv.

### In'ovra classica

«Ils siat sogns Viarvs» dil cumponist César Franck (1822–1890) ei in'ovra per solists, chor ed orchester. Ei se tracta d'ina marcanta cumposiziun da quei temps e d'ina dallas impurtontas dil cumponist sez. La premaudiziun ha giu liug pér igl onn 1977, pia 120 onns suenter sia naschientscha. En rama d'in studi dallas ovras da César Franck ei la lavur vegnida cattada ella biblioteca dalla università da Lüttich. «La dignitad dil text ha motivau il cumponer quels plaid biblics entras differents cumponists, aschia era Haydn e Schütz. Franck elegia la versiun latina dil text, ed el cumbinescha ils plaid da Jesus cun ulteriurs texts biblics e liturgics tier ina pli gronda unitad», scrivan

ils organisaturs en lur cudischet da concert.

Las cantaduras ed ils cantadurs da Sedrun e Rueras fuorman la part dil chor. L'ovra entscheiva cun in prolog cantaus dalla solista e suandada dils siat plaid che Cristus ha detg vid la crusch. Quels vegnan cantai per part dil chor e per part dils solists. Denter ils differents plaid vegn ligiu il text. L'ovra ei harmonicamein e tecnicamein leva, plitost cugl intent meditativ che dramatic. Ins ei spanegiaus sin la representaziun da solistas, solists, orchester e chors.

**Il concert ha liug sonda, ils 15 d'avrel allas 20.15 e dumengia, ils 16 d'avrel allas 16.15 en baselgia parochiala a Sedrun. Prevendita sut numera da telefon 949 22 01 durant las uras da biro usitadas.**